

四庫全書

史部

欽定四庫全書

皇朝文獻通考卷二十一

職役考一

臣等謹按古者體國經野因民授事凡鄉黨州里之間皆以官治之考之周禮其法良備大抵以士大夫治其鄉之事為職以民供事於官為役於以敷政教聯族黨興庶功而均勞逸條理秩然亦上下相維之端也漢治近古三老亭長嗇夫之屬其

職匪一於民之任役者則從而後先之至於唐鄉
職漸微自是凡治其鄉之事皆類於役迨至宋代
役法紛如差役雇役義役屢變而弊彌甚自元暨
明鮮有良規哉

朝政平事簡與民休息鼙鼓之徵公旬之召幾無其
事不獨公家營造一瓦一木不肯徒用民力甚至
修城浚池以及河工興築諸務凡所以為民捍禦
者莫不按日計工人予之直殆實未嘗役一民也

即如近年

皇上平定伊犁大兵入師行極遠然所用皆索倫勒
旅河西近塞之民目覩出車耳聞唱凱而身不與
其役古所稱從衽席上過師者今始見之且所過
之區蠲租賜復殆無虛歲民生其間誠厚幸矣是
故襲狐貉之厚者不知至寒之悽愴享昇平之樂
者不知憚人之況瘁熙熙之衆沐

國家休養生息之恩百有餘年之久自高曾以逮子

孫安居聚處愚氓狃於樂利或有忘乎前代之事
竟若分所應得如擊壤老人者臣等依馬氏前考
仍立此門非徒以體例不容變易而已亦以見職
役為生民之常分而

聖朝寬大實千載一時也謹就現存版籍編為四卷而
復除一卷附焉

天聰八年以漢官陳訴差役重科

命集衆官宣諭之時衆漢官訴於管戶部貝勒之前云所

派差役似有重科之事

太宗文皇帝命大臣察訊所訴多不實因

命傳集衆官諭曰爾衆官在明國時所有人丁若干今有若干孰多孰寡何不細思之朕思我國雖貧爾等如此亦足矣欲令爾等與滿州一例當差尚恐致累今爾等反言苦累過於滿洲滿漢官民雖有新舊皆我臣庶豈有厚薄之分乎滿洲出兵三丁抽一今令爾等亦與滿洲一例三丁抽一為兵爾等以為何如乎且滿洲之偏

苦於漢人者不但三丁抽一也如每牛衆下守臺淘鐵
及一切工匠牧馬人旗下聽事人役等所出不下三十
人當差者凡十有四家又每年耕種以給新附之人每
牛衆又出婦人三口又耀州燒鹽獵取禽獸供應朝鮮
使臣驛馬修築邊境四城出征行獵後巡視邊牆守貝
勒門及派兵防守巨流河在在需人皆惟每牛衆是問
又每牛衆設哨馬二匹遇有倒斃則均攤買補遇征瓦
爾喀時又各餽馬二三匹從征每牛衆復派護軍十名

兵丁二三名往來驅使差回又令餵養所乘馬匹遇各國投誠人至撥給滿洲現住房屋令滿洲展界移居又分給糧穀令其舂米釀酒解納每年獵取獸肉分給新附之人又發帑金於朝鮮貿易布疋仍令滿洲負載運送邊城滿洲又有害冰之役每年迎接新附之虎兒哈於教場看守皮張運送薪水朝鮮蒙古使至駐瀋陽護軍甲喇額真各出一人運給水草若夏月至更有採給青草之役又每年採參併負往朝鮮貨賣每旗以一户

駐英格地方巡緝踪跡又以一戶駐瀋陽渡口看守船隻此皆滿洲偏苦之處若不向爾等詳切言之爾等亦未必深信今滿漢均屬一國人民爾等何竟不知差徭之少倍減於滿洲而滿洲差徭之多實踰爾等三十餘項也諭畢衆官謝罪並釋之

臣等謹按開

國之初規模宏遠而經制未定徭役之事畧見於此敬錄之以備原始之義至於各項差務分派八旗

兵丁者不復與民差類載云

九月嚴濫役民夫之禁先是天命十一年

太宗即位之初嘗

諭羣臣云城郭邊牆事關守禦勞民力役事非得已今修葺已竣嗣後不復興築用卹民力專勤南畝以重本務至是自郊外還集諸臣於朝

諭之曰朕昨出見民間耕種愆期蓋因牛泉章京有事城工欲先時告竣故額外派夫致誤耕作築城固為正務

然田地荒蕪民食何賴嗣後有濫役民夫致妨農務者該管牛衆等俱治其罪

順治元年置各州縣甲長總甲之役各府州縣衛所屬鄉村十家置一甲長百家置一總甲凡遇盜賊逃人姦宄竊發事件隣佑即報知甲長甲長報知總甲總甲報知府州縣衛核實申解兵部若一家隱匿其隣佑九家甲長總甲不行首告俱治以罪

臣等謹按保甲為弭盜安民之良規

國家定鼎之初即舉而行之其後屢經申飭為法甚
詳且備此蓋其權輿也考十七年令民間設立里
社則有里長社長之名惟八旗莊屯以設領催不
更設里長南省地方以圖名者有圖長以保名者
有保長其甲長又曰牌頭以其為十家牌之首也
十牌即為甲頭十甲即為保長又曰保正是皆民
之各治其鄉之事而以職役於官沿諸古法變而

通之與民宜之各直省名稱不同其役一也又有
耆老一項例有頂帶亦預聞鄉里之事考順治三
年僉都御史李日梵言耆老不過宣諭

王化無地方之責非州縣鄉約比若以連坐之法加之
似於情法未協乃定議耆民在九家內者連坐在
外者免其株連

定取用匠夫之例臣等謹按凡內工取用匠夫行
文工部移都察院轉行五城取送如工程緊急即

行坊官取送至康熙十年定各衙門應用工匠均
行都察院轉行五城取用永以為例

二年令順天府屬州縣各派匠役一百名赴工應
役時以營建

太和殿需用工匠行令各州縣派解應役按工給值
至十二年工部以匠役缺少工程稽遲復奏令順
天等八府派解赴工又令山東山西二省查各匠有
願應役者解部供用其後大功告成凡匠役皆酌

路塗遠近按日給與飯銀令其回籍

又除豁直省匠籍免徵京班匠價前明之例民以籍分故有官籍民籍軍籍醫匠驛竈籍皆世其業以應差役至是除之其後民籍之外惟竈丁為世

業

匠價詳見十五年

三年

特命大臣訂正賦役全書因田定賦計丁授役舊有經制

明季加派紛繁民生凋瘵

世祖章皇帝定鼎後

特命大臣察覈款項盡除濫額擬定賦役全書進呈

御覽至十四年告成

頒行天下茲後隨時修訂備詳舊制以現行者為定則

臣等謹按取民之制有田則有賦有丁則有役而
丁役分銀差力差則有受役輸銀之不同其間分
異等則派別名目皆役法也今考全書所載地糧
自歸田賦入丁宜屬戶口惟是丁徭之征原係版

籍供役而凡民役之在官者編徵工食召募應役其數具列於中優免服除亦在焉是故會典所載祇舉大綱考丁徭者惟全書可備稽云

又定編審人丁征徭科則編審之法核實天下丁口具載版籍年六十以上開除十六以上添註丁增賦亦隨之考直省丁徭有分三等九則者有一條鞭徵者有丁隨地派者有丁隨丁派者其後改隨地派十居其七總計直省徭里銀約三百數十

餘萬亦間徵米徵豆其科則最輕者每丁科一分五釐重者至一兩三四錢不等而山西有至四兩餘者鞏昌有至八九兩者大抵因地制宜如前代差役視民間物力為輕重故各有不同三年或五年一編審凡所以平賦役清隱匿別老幼均差徭律有差遣不平賦役不均隱蔽差役逃避差役之目皆役法之條件也又有屯丁者明代衛所屯軍各給以地入

本朝除其軍籍改為屯丁其後惟留駕運漕船之運
丁其非運丁者陸續改入民籍現運屯丁則免科
間丁各科銀不等皆免其民丁重派又三等九則
之目沿自前明一條鞭征法亦同其法將均徭均
費等銀不分銀力二差俱以一條鞭從事凡十甲
丁糧總於一里各里丁糧總於一州縣州縣總於
府府總於布政司通計一省丁糧均派一省徭役
里甲與兩稅為一凡一州縣丁銀畢輸於官官為

無募以充一歲之役小民得無擾而事亦易集至
康熙五十二年

恩詔以現在丁冊定為常額續生人丁永不加賦雍正元
年以後各省丁徭皆陸續攤入地畝惟編審人丁
以供差役其詳具見於戶口考

又定內外各衙門額設吏役凡內外各衙門書吏
皆取良民充役定有經制額數不許濫設

國初沿前明之例吏典由各處僉撥充役後改為考

取或由召募投充凡在內各衙門書役投充必取
原籍地方官印結方准著役不許有冒籍冒姓頂
替之弊各衙門各派一官專司稽察在外府州縣
書役必取隣佑親族甘結地方官印結方准著役
其有無弊端責令道員按察司查察之司道關鹽
書役令督撫稽察督撫衙門自行稽察不許有重
役濫充之弊役以五年為滿役滿不退者斥革凡
在內書役及各館閣供事役滿報部彙至三月於

吏部衙門考試封貯試卷以俟在外考試者在外
書吏役滿印官保送巡撫每年七月彙集考試并
試卷送吏部至年終吏部一併校閱定等第名次
奏

聞請

旨以雜職等官分別銓用其府州縣額設祇候禁子弓
兵於該納稅糧三石之下二石之上戶內差黥免
其雜泛差役勿得將糧多上戶差占各處衙門又

有快手皂隸門卒庫子諸役皆按額數召募額外
濫充者謂之白役私用白役者有禁白役犯贓與
正役同罪通州坐糧廳所屬八行運役及倉役亦
有定額令知州僉選誠實良民應役不許旗人充
應不許一人充兩三役兼充者謂之霸役罪至徒
初定祿秩之時吏役銀米皆有定額在內各衙門
聽事書役及皂役隸卒匠夫人等按季給以銀米
多寡各殊在外各衙門吏書門子舍人皂隸禁卒

鋪兵倉夫斗級工匠人役亦按季給以工食銀兩
其後屢經裁減皆於州縣地畝編征詳載賦役全
書

臣等謹按吏役之設今古異制而未嘗不同如內
外衙門之有書吏猶古之有曹掾古者由於辟召
故有秩有職士人為之不以爲賤今由召募充役
官府故皆名之曰役然必取之鄉戶之中擇而使
之其受役有期考察有法入仕有階亦與古相似

其在鄉里非出於微賤者亦可以與士齒凡吏之能其事者可以贊助政理有裨吏治在宋代所云曹司押錄諸名目皆其類也其曰快手者以供奔走驅使如宋之承符人力手力之屬又以馬步別為名目其主捕逐盜賊者別名健快亦曰應捕其役如古游徼求盜大率不得與士人齒其諸雜役則又卑矣民壯一項考之前明其初為數不多後州縣官以額設兵丁隨營差操不敷驅遣多取民

間壯丁教以技藝以備守城禦寇已遂泛應雜差
用供奔走

國初頗裁其冗制為定額凡督稅課攝詞訟捕盜賊
祇候迎送皆役使之白役非額設之人諸正役私
引為助律有明禁然州縣事劇役繁必藉其力勢
有不能盡革者惟在得良民充之正役有缺即以
代役書吏雖禁額外濫充然因稅糧由帖戶口冊
籍雇募攢造者則勿論或從書吏習業名曰貼寫

亦非所禁又各衙門皆有募充書識凡經制之吏
有缺即於現充書識內選代惟濫取掛名及監司
衙門收受納班錢者有禁自書吏以下諸役既庇
官事亦養身家在民每願為承應非如宋時役法
之害視為畏途者比也其以鄉人治其鄉之事者
鄉約地方等役類由本鄉本里之民保送僉充而
地方一役最重凡一州縣分地若干一地方管村
莊若干其管內稅糧完欠田宅爭辯詞訟曲直盜

賊生發命案審理一切皆與有責遇有差役所需
器物責令催辦所用人夫責令攝管稍有違誤卽
責立加終歲奔走少有暇時鄉約里長甲長保長
各省責成輕重不同凡在民之役大畧若此

又定賦役不均及脫漏戶口隱蔽差役逃避差役
之律凡有司雜泛差役皆驗籍內戶口田糧為派
差之差等若放富差貧那移作弊者罪之如由部
中派取物料必酌所屬大小豐歉坐派不均者亦

罪之在民戶有定籍按籍受役若戶不附籍及隱蔽他人戶則差役不平應治其脫漏之罪仍改正當差若民戶逃往他處以避差役者罪如之并治里長故縱之罪若丁夫雜匠在役而逃與故縱者皆罪之

又禁革主保里長并催頭大戶名色天下各府州縣編賦役冊以一百一十戶為里推丁多者十人為長餘百戶為十甲甲凡十人歲役里長一人管

攝一里之事城中曰坊近城曰廂鄉里曰里里長
十人輪年應役催辦錢糧勾攝公事凡十年一周
先後各以丁數之多寡為次其鰥寡孤獨不任役
者帶管於百一十戶之外名曰畸零若有妄稱主
保小里長保長此與他處保長不同主首等項名色生事擾
民者皆治其罪里中有合設耆老者於本鄉年高
有德衆所推服人內選充不許罷閑吏卒及有過
之人充應凡里甲之民輪充現年止令催納各戶

錢糧其一應差徭勿使現年受累若有徵收錢糧
派人作催頭者或有借稱徵糧令里中僉報大戶
派納銀米至於破產者皆嚴行禁革其州縣官或
於額外私派而上司徇隱者許里長甲長據實控
告依律治之

又禁止私充牙行埠頭凡城市鄉村通商之處陸
有牙行船有埠頭為客商交易貨物並選有抵業
人戶充應官給印信文簿附寫客商船戶住貫姓

名路引字號物貨數目每月赴官查照不許私充
雍正二年有言各省牙帖之弊者畧為州縣正稅
之外又有雜稅戶部額徵為數無幾將所收田宅
印契典鋪行帖等銀已綽然解部有餘至小民趁
集交易乃數百文數十文之事為利甚微藉以營
生餬口而地方光棍自呼為經紀百十成羣逐日
往州縣中領牙帖數十紙每紙給銀二三錢不等
持帖至集任意勒索不論貨物大小精粗皆視賣

之盈縮為抽分之多寡名曰牙帖稅少與齟齬即
行驅逐不容陳設於街道此積弊也於是令各省
藩司查明禁止至十一年奉

諭旨各省商牙雜稅額設牙帖俱由藩司衙門頒發不許
州縣濫給所以防增添之弊不使貽累於商民也近聞
各省牙帖歲有增添即如各集場中有雜貨小販向來
無籍牙行者今概行給帖而市井奸牙遂恃此把持抽
分利息是集場多一牙戶商民即多一苦累甚非平價

通商之本意著直省督撫飭令各該藩司因地制宜著
為定額報部存案不許有司任意增添嗣後止將額內
退帖頂補之處查明換給再有新開集場應設牙行者
酌定名數給發亦報部存案庶貿易小民可永除牙行
苛索之弊矣

互見市
糴考

又禁有司官私役部民凡有司官私役部民出百
里之外及久占在家使喚者有禁仍追雇直若有
吉凶及在家借使雜役不得過五十名役其人不

得過三日違者以私役論

又定州縣舖司舖兵及弓兵之制禁止私役直省
各州縣公文來往役民遞送名曰舖兵每十五里
置急遞舖一所設舖兵四名舖司一名於附近有
丁力糧近一石之上二石之下者黥充須要少壯
正身與免雜泛差役凡公文一到即刻遞送晝夜
須行三百里稽留者分別時刻治罪若公文有損
壞沈匿拆動原封者亦分別治罪舖司為舖兵之

長專一於該管鋪分往來巡視其提調官吏每月
親臨稽查若有無藉之徒不容正身應當用強包
攬多取工錢以致公文有誤者重治其罪其各衙
門一應公差人員不許差使鋪兵挑送官物各私
齎行李若鋪舍不修什物不備鋪兵數少及老弱
當役則罪其鋪長巡檢司所屬弓兵專司巡緝地
方亦不許包攬應當並禁止私役違者如私役鋪
兵之罪

四年設直隸沿河堤夫御史佟鳳彩言近畿沿河州縣屢年衝決禾稼被淹有虧正賦宜令各州縣額設堤夫量其河之淺深口之寬狹修築堅固庶河水不致汎漲而秋成可望下部議允之

臣等謹案瀕河之地例有夫役守護黃運兩河皆然此所請設乃舊制未備者餘并詳後

又設立臨河州縣墩堡舖夫快壯從總河楊方興請以護漕運也

九年令直省州縣置社學社師每鄉置社學一區
擇其文義通曉行誼謹厚者補充社師免其差徭
量給廩餼令提學考核之雍正元年復申明其制
十一年定流民附籍當差之例明季民多流移所
居之地不附冊籍至是部臣議奏凡外省新舊流
民俱編入冊籍與土著一體當差新來者五年當
差從之

十二年增給河夫工食時遣大臣視河言額設河

夫工食不敷請酌為增給下部議行仍令河臣嚴
察河工官吏扣折夫食

臣等謹案民間夫役河工為大用民之例有二一
為僉派一為召募皆屬民間力役前代沿河州縣
有歲修民夫頗為苦累

國初改設河夫額給工食編入賦役全書十六年河
臣朱之錫條奏河政議增河南夫役均派淮工夫
役撥補河夫工食皆下所司議行考順治九年河

決封邱起大名東昌兗州及河南丁夫數萬塞之
此僉派舊例也額設之夫則召募新例也間遇大
役召募不足即用僉派仍給工食詳見於後又考
河工夫役其名不一黃河兩岸皆有堡夫二里置
堡設夫二名住宿堡內常川巡守每日責令擔積
土牛以資修補堤工之用後令改築子堰運河所
設亦同山東有黃運河徭夫分汛供役遇有險要
調集搶護又有淺溜橋牯壩渡等夫各以其事供

役人於有泉之十七州縣額設泉夫歲以春夏秋
三季在本境浚泉栽柳冬季調赴運河均令濬淺
河南有浚船柳船長夫埽工長夫樁埽夫直隸河
浚有祔夫淺夫漳河有防夫其或栽或設事例不
一皆於沿河州縣召募應役山東運河大濬額募
夫六千有餘小濬用夫千二百有餘日給工銀外
仍給以器具銀江南浙江海塘例設堡夫塘長湖
廣江防有隄長圩長圩甲圩役其沿江隄岸例用

民間夫役按糧均派至康熙五十五年

聖祖仁皇帝賞銀六萬兩以助民工至雍正六年

世祖憲皇帝亦賞銀六萬兩以助民工四川亦有堰工按
照田畝均攤夫價解官募夫冬月修築考各直省
所用夫役皆始由僉派繼歸召募蓋役民給直較
古役法為最善矣

十五年令直省匠價仍照經制徵解工部等
衙門奏言按經制所載遇有大工直隸各省徵諸

匠役解赴京師每年春秋更換後匠役屢解屢逃因而折工價解部於順治二年奉

旨除免匠價今臣部工程尚繁需用不貲應將匠價仍照經制徵解從之至康熙三十六年以後陸續併歸田畝各省賦役全書分析項數名目具存十六年令直省舉行鄉約之法宣講

上諭

臣等謹按先是順治九年

頒行六諭卧碑文曰孝順父母恭敬長上和睦鄉里教訓
子孫各安生理無作非為至是令五城設立公所
講解開諭以廣教化直省府州縣亦皆舉行鄉約
各地方官責成鄉約人等每月朔望聚集公所宣
講至康熙九年

頒上諭十六條一敦孝弟以重人倫一篤宗族以昭雍睦
一和鄉黨以息爭訟一重農桑以足衣食一尚節
儉以惜財用一隆學校以端士習一點異端以崇

正學一講法律以儆愚頑一明禮讓以厚風俗一
務本業以定民志一訓子弟以禁非為一息誣告
以全善良一誠窩逃以免株連一完錢糧以省催
科一聯保甲以弭盜賊一解讐忿以重身命令府
州縣鄉村人等切實遵行十八年浙江撫臣衍輯
直解奏進名曰鄉約全書刊刻分發至雍正二年

御製

聖諭廣訓萬言

頒發直省通行講讀於是人敦孝弟俗化敦龐蒙樂利之澤於無疆矣

十七年禁有司私派里甲之弊凡有司各官私派里甲承奉上司一切如日用薪米修造衙署供應家具禮物及募夫馬民壯每年婪飽之弊通飭撫按俱行嚴禁康熙八年科道官言各處土產有文武官員行票差役令州縣買送州縣按里派取等弊請行嚴禁部臣又言州縣加派里民近經禁革

乃以日用供應取辦牙行舖家並強索賤市應勒石永禁皆從之至三十九年復申陋規雜派之禁如遇大差大役有因公濟私以一派十者又有每年每節派送大小禮儀者郡守之交際又有派之各屬者有府州縣衛所官出門派中大路費以及跟役之食用者有上司差使往來派送規例下程者起運餉銀派解費者嗣後革除陋習不得仍蹈前轍又部議湖廣等處徵收錢糧有公然科派如

閩邑通里共攤同出者名曰軟臺如各里各甲輪
流獨當者名曰硬駝豪劣奸棍包攬分肥應勒石
永禁從之

皇朝文獻通考卷二十一

欽定四庫全書

史部

皇朝文獻通考卷二十二至
五

內閣中書臣寶汝翼覆勘

總校官中書臣孫溶

欽定四庫全書

皇朝文獻通考卷二十二

職役考

康熙元年令江南蘇松兩府行均田均役之法時
戶科給事中柯聶疏言任土作賦因田起差此古
今不易之常法但人戶消長不同田畝盈縮亦異
所以定十年編審之法則役隨田轉冊因時定富
者無免脫之弊貧者無童負之憂勞逸適均法至

善也臣每見官役之侵漁差徭之繁重不一而足其源總由於僉點之不公積弊之未剔目下編審屆期請痛除宿弊以拯民困查一縣田額若干應審里長若干每里十甲每甲該田若干田多者獨充一名田少者串充一名其最零星者附於甲尾名曰花戶此定例也各項差役俱係里長挨甲充當故力不勞而事易辦獨蘇松兩府名為僉報殷實竟不稽查田畝有田已賣盡而仍報里役者有

田連阡陌而全不應差者不特十年之中偏枯殊
甚至年年小審那移脫換叢弊多端田歸不役之
家役累無田之戶以致貧民竭骨難支逃徙隔屬
請令撫臣通行兩府及今大造之時必期田盡落
甲役必照田務將本區之田均役本區十甲倘本
區田多則派入下區按田起役不得憑空僉報以
滋賣富差貧之弊庶幾役均而民便矣其他花分
子戶詭寄優免隔屬立戶買充冊書諸弊皆宜嚴

加禁革戶部議覆通行

臣等謹案均役之法時惟知婁縣李復興行之最為得宜各屬皆倣而行之因編為均役成書沈荃序畧曰婁邑自均役以後流亡復歸荒蕪日墾鄰邑外省相繼取法所慮世俗昧於均役之義而議其無義且以為師心而不法古夫三代之役軍旅土功而已夫子所謂使民以時王制所謂歲不過三日皆此役也井田廢而兵民分兵久無預於民

若夫築城浚川則計田出費以供其事如近日吳
淞之役豈非至均者哉若議里役不設則古之鄉
長里正本非役也周之比長里宰皆下士閭胥鄼
長皆中士旅師比師皆上士黨正縣正皆下大夫
州長則中大夫此命官也豈役也哉漢去古未遠
故亭長嗇夫聽獄訟收賦稅皆有祿秩張敞朱邑
朱博薛宣之流由此至卿相隋人欲以鄉正理五
百家獄訟李德林謂鄉官治民恐徇私不便唐時

此意未泯故柳宗元言有里胥而後有縣大夫有
縣大夫而後有諸侯有諸侯而後有方伯連帥是
里胥與連帥貴賤雖殊而皆為天子任理民之責
者也未聞有比較鞭笞破家亡身者也唐末大亂
諸節帥多出羣盜所用守令視民如仇而用之日
新由是鄉里之職大為民困此豈古所謂役哉五
代因循至宋未改或差役或雇役或義役皆能困
民然弊則改之初無定轍元時賦最輕故役亦輕

而民多富明室賦重縣令催科難徧故分編里甲使之催賦俗曰經催是役之設為催賦設也賦辦則役舉矣今均田之法家自催賦無不辦之賦是即無不舉之役豈必辦賦之法歲破數百家斃數百命而後謂之役哉向之有役有不役故見其役今也即賦為役故不見其役若遂議其無役此正如對和羹而別索鹽梅多見其不知味也若謂以田從人為非則向者以人從田圖蠹圖書為政而

官與民交受其害今之以田從人業戶自為政而
官與民交受其利行且徧此法於吳越間雖百世可
也

二年濬淮安涇河閘計田出夫漕運總督林起龍
疏言開濬涇河閘自淮城迤南運河東岸至金吾
莊延袤七十餘里下流淤塞處約可十餘里令山
陽寶應二縣計田出夫衆志鼓舞甫二十日畢事
河道深通閘流無阻直達射陽湖入海居民田廬

可無水患下部知之

六年嚴禁江西提甲累民之弊御史戈英疏言州縣每年設有輪值甲長凡催徵錢糧及衙門需用各項之費皆令甲長承辦獨江西更有提甲之弊既將現年甲長追比各項銀兩復提次甲為現年甲長責成備辦禮物廣信等府積弊尤甚至有連提數甲不止者累民已極請飭該撫嚴禁奉

旨令督撫察奏巡撫董衛國以並無私派奏覆總督郎廷

佐奏提甲之弊風聞如御史言奉

旨嚴飭令確查禁革

臣等謹案提甲之說始於前明嘉靖中名曰提編實則加派當時以兵役繁興為此不得已之法迨乎役罷名存遂不能改其後所行十段錦亦有此弊汙吏緣以為奸非值

聖明之世不能一旦除之也

七年定驛遞給夫之例凡有驛之處設有夫役以

供奔走各按路之衝僻以為多寡額數不一其夫
日給工食自一二分以至七八分不等皆入正賦
編徵若額外雇用則按遠近加給工食水驛用緯
夫亦同凡應給夫役者按品定數不許額外強索
是年戶科給事中吳國龍疏言驛遞苦累最甚除
出征大兵及駐防官兵家口自北往南皆係緊急
軍機應照例給夫外其自南往北者宜停止給夫
庶不致差繁費重事下兵部部臣言出征大兵關

係軍機應照舊例其駐防官兵家口無論往南往
北陸路量給夫車下水不給緯夫上水緯夫比舊
例減半給發自京起程者臣部定限自外起程者
該督撫定限報部不許沿途逗遛違者治罪從之
臣等謹案郵傳之設除車馬船隻外水陸皆有額
設人夫雖例給工食皆募民充之差役稍繁莫不
臨時添雇是亦民役之一也律載包充驛夫詐索
驛夫皆有明禁其出使人員役使民夫擡轎者治

罪仍追雇值銀八分五釐五毫蓋所以甦驛困亦
所以恤民力又考直省所設之夫名目不同凡有
馬之驛視馬多少例設二馬一夫外有走遞夫白
夫青夫此項裁損夫所雇夫差夫站夫有水驛之處
有水手水夫繹夫南省有轎夫兜夫擔夫損擡夫
皆隨宜額設支給工食

九年於江南山東派夫協濟河工加給工食并停
地方津貼之費是歲九月河道總督羅多以大修

河工額用協夫三萬四千八百餘名請於江南山東兩省僉派協濟事下工部以僉派夫役道遠民艱又恐官吏借端滋擾應行召募為便查舊發工役銀每日四分今加給二分則工程不致遲誤奉

旨河工關係重大時近冬寒勢不容緩倘臨期應募無人復行僉派必致遲誤著該督先行竭力召募儘所得人夫供役如萬不能得就近量行僉派協濟十一月刑科給事中張惟赤疏言河工協濟人夫皆經該地方

津貼而來江南各府方被水旱之災正項尚且議蠲額外豈堪重累前部臣主募夫之議原定每名給工食銀六分今河臣改用派夫豈有募則給工食而派遂不給工食之理所宜一體議給將原派地方按月津貼之說行令停止復下工部議從之臣等謹案河工夫役工有大小則夫役有多寡在河臣酌其緩急時有變通考用夫之多寡如康熙十六年以靳輔為總河大修全河之時考靳輔初

議每日需夫十二萬有奇議令山東江南河南鄰
郡地方協募赴工後經議減仍日用夫三四萬人
皆係設法就近召募其最後奏疏有曰從前河工
原無修治全河之事間有興舉無不勒之州縣派
募里民凡所派之州縣用一費十民不勝其苦累
臣奉

命兩河並舉日需人夫十餘萬若循派募之舊章必半壁
號呼矣乃易派募為雇募多方鼓勵設法招徠十

年之中大功告成而民不擾又議挑運河亦日用夫三萬四千有奇奏疏有云挑濬運河向有每工給銀四分之例亦有撥派坊里人夫量給銀米之例此番工程浩大萬難撥派况坊里人夫率皆老弱不堪之輩而又每每逃逸大抵坊里夫十名不敵募夫三四名之用不若一體召募為便又挑高郵月河因河帑不敷調用附近州縣民夫每名日食米鹽菜銀二分二釐以為日無多故也其大修

歸仁堤令泗州虹縣五河臨淮四處協募人夫一萬又恐有影射透領之弊乃令百姓按田出夫以其土方工價與錢糧抵兌一時頗以為便總其前後諸疏亦見河工夫役之畧矣至二十七年開濬下河於高郵等州縣用夫一二萬則仍派募云

十二年停止河南僉派河夫河南巡撫佟鳳彩疏言河工派夫貽累地方請動支錢糧雇夫應役下工部議允之令凡遇歲修准動河庫銀雇募每夫

月給銀二兩嗣是河道總督王光裕又專疏請停
僉派其歲修夫役動帑雇募皆如河南之例

臣等謹案河工歲修夫役原屬舊例撫臣之為此
請欲以便民也考靳輔奏疏嘗言人夫一項除架
船裝料鋪埽簽樁收放揪頭繩纜栽柳修柳巡查
堤岸看守料物修補水溝填塞狼窩獾穴等務俱
河兵力作僅僅足用至於縵纓打纜搬運草柳拉
埽擡梯挑土幫修埽臺等一切雜作則用歲修人

夫往例歲修工程從無募夫之例皆係酌撥附近民夫資其力役江南河南山東三省皆然後河南一省經前撫臣佟鳳彩因每年所用歲修人役太多且不特附近州縣而隔遠州縣亦行概撥人夫不無遠涉之苦於是具題改為雇夫應用江南山東則仍舊今康熙二十二年山東曹單二縣黃河工程除用額夫之外照例酌撥附近州縣民夫協助額夫力作量各險工共撥歲修夫八九千名見

在舉行考此是歲修夫役例固未嘗盡廢也

十六年禁止有司派罰百姓修築城樓梁口

十七年裁江南鳳陽淮安等府淺夫溜夫改設河兵河臣靳輔經理河工事宜請設江南河兵八營專司河工而罷回所設夫役從之至三十八年又裁徐州所屬額設歲夫改設河兵先是沿河之處皆設有淺夫溜夫以備挑濬募民充應時有裁減至是裁夫設兵遂為定制

十八年令天下立社倉義倉以本鄉之人管理其事時議整飭常平倉法勸諭官紳士民捐輸穀石於鄉村立社倉市鎮立義倉公舉本鄉敦重善良之人管理出陳入新春月借貸秋收償還每石取息一斗儲穀多者管倉人給予頂帶

二十五年置近輔屯莊保甲直隸巡撫于成龍疏言順永保河四府旗民雜處盜警時聞非力行保甲不能寧謐應將各屯莊旗丁同民戶共編保甲

令屯撥什庫與保正鄉長互相稽查有事一體申報究治下兵部議從之

二十九年令直省紳衿田地與民人一例差徭山東巡撫佛倫疏言累民之事第一職役不均凡紳衿貢監戶下均免雜差以致偏累小民富豪之家田連阡陌不應差徭遂有奸猾百姓將田畝詭寄紳衿貢監戶下希圖避役應力為禁革請限二月之內通令自首盡行退出嗣後凡紳衿等田地與

民人一例當差庶積弊一清而小民免偏枯之累得

旨紳衿等優免丁銀原有定例其鄉紳豪強詭寄濫免以致賦役不均積弊已久該撫所奏直省應一體行下其事九卿確議尋議上悉如所奏一體通行

又徵僉派河夫工銀令州縣雇夫應役河道總督王新命山東巡撫佛倫合疏言前以沿河州縣僉夫苦累將額編工食銀兩徵解令河員募夫應役

但非地方官專司雇夫恐致逃散請令州縣雇夫解交下工部議從之

臣等謹案河工用夫繁多勢不能不取之民徵銀召募乃隨時權宜之法也河臣于成龍嘗請豁免民夫得

旨以河道工程浩繁未允所請河臣董安國上言黃運兩河險汎甚多若將民夫豁免專責河兵必致貽誤止請酌減民夫一二千名部議從之先是既設河

兵原為減省夫役于成龍再為總河又以歲夫苦累亟請變通言每派歲夫一名約費銀二十兩老幼充數或到工即逃計歲夫數將七千請每名量徵銀五兩編入正供徵解河工添設營兵三千餘酌量緩急分班搶護亦從之大抵歲修夫役例出僉派改為徵銀召募設兵乃役法之變耳法非可執總期不累於民則善矣

三十二年發民夫修

盛京城垣奉天將軍綽克托疏言修理

盛京城垣需用夫役請在本處民內按丁取用工部
議覆從之

臣等謹案從來修築大工莫不起發民夫

本朝之例取用民丁給以工食即召募之義蓋於公
旬之中隱寓優恤考律載凡軍民官司有所營造
不申明待報而擅起差人工者計雇役之值罰之
若非法營造及非時起差人工者罪亦如之惟城

垣倉庫公廨有急修處一時起差丁夫修理者不在此限

三十九年令甲首催徵錢糧時行滾單法如一邑每里之中或五戶或十戶止用一滾單逐戶開明田糧及應完分數限期發給甲首挨次滾催令甲內之民照例自封投櫃以免里長銀匠櫃書稱收作弊

四十七年申行保甲之法先是順治元年即議力

行保甲至是以有司奉行不力言者請加申飭部
臣議奏弭盜良法無如保甲宜倣古法而用以變
通一州一縣城關各若干戶四鄉村落各若干戶
戶給印信紙牌一張書寫姓名丁男口數於上出
則註明所往入則稽其所來面生可疑之人非盤
詰的確不許容留十戶立一牌頭十牌立一甲頭
十甲立一保長若村莊人少戶不及數即就其少
數編之無事遞相稽查有事互相救應保長牌頭

不得借端魚肉衆戶客店立簿稽查寺廟亦給紙
牌月底令保長出具無事甘結報官備查違者罪
之

欽定四庫全書

皇朝文獻通考卷二十三

職役考 三

雍正元年山東挑濬運河免派河夫巡撫黃炳奉
諭旨運道淺阻舊例撥派民夫挑淺濟運朕思連年薄收
百姓困苦未必堪此重役將來流亡日多民生日蹙深
為可憫古人救荒之策有大興工作以濟民食者不若
竟動正項錢糧雇募民夫給以工食挑濬運河則應募

既多散者復聚民資工食稍延殘喘民心鼓舞工程易就運道早通於興役之中即寓賑濟之意莫便於此

又嚴禁各衙門書辦缺主凡經制書役年滿缺出該管官在現充書識內僉點更替其弊也老吏把持所管止令新役出名任事而操縱夤緣仍屬老吏或索取租銀謂之缺主雖律有明禁無能斥革者至是都察院奉

諭旨各衙門募設書辦不過令其繕寫文書收貯檔案為

日既久熟於作弊已經考滿復改姓換名竄入別部奸弊叢生更有一等缺主名色掌握一司之事盤踞其中交通賄賂上下朋奸書辦尚有更換缺主總無改移子孫世業遂成積蠹自後書辦五年考滿各部院堂司官查明勒令回籍聽選如有逗遛不歸者飭令五城司坊官稽查遣逐其缺主倚恃勢力抗違潛匿者即叅究押解回籍各部院一年一次保結具奏倘仍有潛居京師者出結之大臣官員一併治罪尋有奏言浙江藩司衙

門有通供一缺父子兄弟相傳錢糧盡歸掌握又
學院則有掌案鹽差則有長接把持一切與缺主
無異請永遠禁革乃下部通行直省一併嚴革其
大小衙門胥役俱令五年為滿改業歸農如年滿
不退更名復役或父出子入或改充別衙門併革
役復入者俱照例治罪

又禁止州縣官藉欽差公費名色私派里民

禁止虛冒河夫之弊沿河州縣各有額設河夫凡

濬淺築隄巡防補葺修搶擁護皆資其力管夫河
官間有侵蝕河夫工食者僅設夫頭數人其餘則
臨時雇募鄉民充之不諳工程往往致誤

世宗憲皇帝夙聞其弊

諭工部行令總河巡撫嚴飭河道不時稽查禁絕虛冒違
者罪之

二年令州縣歲舉老農給予頂帶先是元年

恩詔農民有勤於耕種務本力作者令地方官不時加獎以

示鼓勵是歲又奉

諭旨勸課農事於每鄉中擇一二老農之勤勞作苦者優其獎賞又

諭朕惟四民以士為首農次之工商其下也漢有力田孝悌之科而市井子孫不得士宦重農抑末之意庶為近古士子讀書砥行學成用世國家榮之以爵祿而農民勤勞作苦手胼足胝以供租賦養父母育妻子其敦龐淳樸之行豈惟工賈不逮亦非不肖士人之所能及雖

榮寵非其所慕而獎賞要當有加其令州縣有司擇老
農之勤勞儉樸身無過舉者歲舉一人給以八品頂帶
榮身以示鼓勵四年以四川開墾田地民苗不知開墾
之法部臣議令於在川居住湖廣江西之民選擇
老農給以衣食令其開墾俾民苗學習俟有成效
題給頂帶送歸原籍七年廣西布政司張元懷言
老農一歲一舉品秩似屬易邀請嗣後三年一舉
行從之

又定揀選民壯之制各省州縣例設民壯五十名
每不足額數餘亦僅供雜役刑部尚書勵廷儀奏
請團練民壯令各州縣揀選民間壯丁務足額數
實給工食分派學習鳥鎗手二十名弓箭手二十
名長鎗手十名選其尤壯者各一人點充頭役
不時操練務使技藝嫻熟皆堪應用奉行不力者罪
之至六年因山東濟寧州盜傷官弁議給各官防
護之人部臣言州縣額設民壯又有捕役皂快人

等防護未嘗無人因州縣官視為具文不加操練卒
然有事即畏避潛藏請於各州縣壯丁內挑選壯
健能軍器者二十人用為長隨以資防護兩司官
給與五十名道府四十名同知通判二十五名總
於州縣壯丁內揀送州縣佐貳官酌給四五名即
在本州縣揀選每名歲給工食銀六兩不扣荒缺
尋以編修吳應棻言州縣民壯多寡不一因各官
派撥為隨身健丁以致衝繁之地不敷差遣請將

衝繁州縣之民壯停其派撥下部議從之其後復
經裁減存設不一皆為經制先是江南撫臣嘗言
州縣捕盜設有捕快一役不載經制全書並無工
食充此役者率皆市井無賴承緝盜賊每多縱盜
扳良之弊請一概革除其緝拏之責宜任民壯以
專責成尋議各州縣馬快僅有八名實屬不敷請
以民壯合為一役名曰壯快一體操練分班巡緝
從之

臣等謹案捕快一項其役頗賤其責實重蓋良善之民所不能為者盜賊踪跡詭秘性情兇悍州縣專役捕緝乃可擒獲其捕盜有限輕則加以扑責重則質其妻子能獲要盜賞亦隨之大抵捕役不可廢令民壯協助之為宜耳

又禁革各衙門掛名吏役直省大小衙門吏役向有掛名一項臣僚條奏有陳其弊者畧言文職大小各衙門除正身吏役貼寫幫差人等外皆掛名

吏役其數甚多其名在官實不當差不過指稱名
色躲避差徭且有不肖之徒借端生事欺壓良民
況前次掛名假冒食糧兵丁之類盡行革除彼游
惰已久豈甘奉令守法必將謀入衙門又復為掛
名之吏胥差役亦未可知請將此掛名吏役槩行
革除部議允行又條奏內有言直省督撫司道衙
門俱有經制吏役緣康熙十三年間督撫有添設
儲將旗令傳宣材官等名目司道亦加增一倍雖

經禁革白役不無明除暗附之弊府廳州縣等衙門或一吏而兩人分頂或一差而數人共當背地營私小民受害更有吏員一項五年期滿考給職銜乃竟有從未服役一日賄賂捏名倒提年月遂假衣頂出入公門武斷鄉曲請嚴加裁汰違者治罪亦下部議准通飭行之

又禁各省門差之弊各省文武衙門各有額設夫役例不得濫派時條奏內有以門差為言者畧謂

北五省文武衙門每晚各派更夫三四十名不等
又茶夫火夫燈夫一月一輪或十數名或八九名
不等凡各官出入需用損夫多至百餘名皆挨戶
輪當城市鄉村無一得免曰門差查文職衙門有
民壯門子武職衙門有巡兵伴當損夫文有各班
差役武有步兵原資差遣何以復累民間枵腹應
差週而復始稍有遲悞即受刑責積弊宜禁下部
議如所奏通行禁止

又定社倉法設正副社長以司倉事先是既立社倉令本鄉之人管理日久弊生官民多受其累至是奉

特旨申飭因定社倉之法令地方官開誠勸諭不得苛派以滋煩擾所捐之數立冊登明不拘升斗積少成多每社設正副社長擇立品端方家道殷實者二人為之果能出納有法鄉里推服按年給賞十年無過令督撫題請給以八品頂帶徇縱者即行革

懲侵蝕者按律治罪其代給每年收息二斗俟息已二倍於本止收息一斗社長預於四月上旬申報給貸定期支散十月上旬申報受納臨放時願借者先報社長州縣計口給發交納時社長先行示期依限完納其冊籍之登記每社設用印官簿二本一社長收執一州縣存查登載數目毋得互異其存官一本夏則五月中繳至秋領出冬則十月中繳至春領出毋許遲延以滋弊竇每事畢州

縣社長將本數申報上司如有地方官抑勒那借
強賣侵蝕者許社長呈告上司參處尋以督撫陳
奏屢加申飭令按鄉分社公舉倉正倉副經管又
令於正副社長之外再公舉一身家殷實者總司
其事令其不時稽查如有欺隱責令賠償果能使
倉儲充牧准給

恩典以示鼓勵其所需一切紙張筆墨人工飯食或行勸
輸或撥罰項以充其用不許濫行科斂致滋擾累

又嚴禁河南河工派累里民河南河工買草辦運
及搶工夫役州縣俱派里民奉

諭嚴飭督撫諸大吏禁革其弊

又禁革江西里長催頭江西巡撫裴率度奉

諭旨地丁錢糧百姓自行投納此定例也聞江西省用里
民催收每里十甲輪遞值年名曰里長催頭小民充者
有經催之責既不免奸胥之需索而經年奔走曠農失
業擾民實甚須即查明通行裁革若慮裁革里長輸納

不前亦當另設催徵之法或止令十甲輪催花戶各自完納庶為近便務須斟酌盡善無滋民累以廣惠愛元元之意

又禁止直省大小衙門各項科派累民之弊直省衙門派累里下錮習已久時臣僚條奏有言其弊者畧言各省大小衙門遇有公事需用物件無不出自民間在潔已愛民者給發官價採買仍不累及小民而貪鄙之員則恣行科派凡一應工料食

物器皿等項有一項設立一項總甲支值官府名為當官所有需用之物票著總甲從各鋪刻期即繳因而總甲串通奸胥蠹役以當官為名從中漁利或借端多派運回私室或指官嚇詐婪財入已即發官價亦必低潮折扣十不償五奉法小民惟有隱忍更有甚者百工技藝傭工人等多係貧苦之家缺一日之工即少一日之食而官府罔恤民艱凡工作匠役亦必設立總甲派定當官某月則

其人當某衙門以次輪轉伺候督工則呵叱鞭笞
工食則遲延短少因而總甲胥役設立貼差名色
其有不願赴官者勒令出銀幫貼官符一出差役
紛馳魚肉小民莫此為甚請

勅諭各省督撫嚴行禁止奉

諭旨大學士議奏尋議上如所條奏將設立總甲出票官
買派工伺候嚴行禁止務照時價工價給與鋪戶工
役違者指名題參從重治罪又內閣學士巴錫奏

言整飭州縣先宜革除陋規如派催里長有茶果之名編審有酬勞之例迎春鄉飲均有謝禮應嚴行禁革部議從之九年奉天府尹楊超曾疏言奉天各屬從前一切公務皆取給里下總計一歲之科派多於正額之錢糧如遇奏銷編審大計自府尹以至知縣衙門均有陋規名為造冊之費科歲考試自府丞以至知縣衙門亦有陋規名為考試之費至大小官員到任陋規多端俱行攤派更

或銜蠹里書從中拊一派十侵收包攬臣已嚴飭
各屬勒碑永禁並令嗣後徹底澄清不許絲毫派
累得

旨將所奏宣示於外令奉天官吏人等永遠遵行

四年嚴飭力行保甲定保正甲長牌頭賞罰及選
立族正之例自康熙四十七年整飭保甲之後奉
行既久往往有名無實是歲奉

諭旨弭盜之法莫良於保甲乃地方官憚其煩難視為故

套奉行不實稽查不嚴又有藉稱村落畸零難編排甲至各邊省更藉稱土苗雜處不便比照內地者此甚不然村莊雖小即數家亦可編為一甲熟苗熟種即可編入齊民苟有實心自有實效嗣後督撫及州縣以上各官不實力奉行者作何嚴加處分保正甲長及同甲之人能據實舉首者作何獎賞隱匿者作何分別治罪九卿詳議具奏尋議已行之法照例飭行地方各官不實力奉行處以降調如村落畸零戶不及數者即就

其少數編之至熟苗熟獍已經向化令地方官一體編排保甲如保正甲長牌頭果能實力查訪據實舉首者照捕役獲盜過半之例酌量獎賞如瞻徇隱匿者即酌量懲警如有堡子村莊聚族滿百人以上保甲不能徧查者揀選族中人品剛方素為閭族敬憚之人立為族正如有匪類報官究治徇情隱匿者與保甲一體治罪

又令江西浙江福建棚民廣東寮戶照保甲之法

一體編查先是申嚴保甲已議苗獍一體編排其苗
中保甲謂之合樁除隔省及生苗地方或村寨相
遠者不必合樁外村寨附近之處皆令合樁互相
防守尋議江西浙江福建三省各山縣內向有民
人搭棚居住以種麻種菁開爐煽鐵造紙做蒜等
項為業其間土著甚多亦有隣省失業之人流寓
令各該督撫將現在各縣棚民照保甲之例每年
照戶編查責成地主并保甲長出具保結州縣官

據冊稽查倘住居星散不論棚數多寡自為一甲互相稽查內有棚民已置產業并認糧承納入籍者俱編入土著一體當差至一邑中有四五百戶以及一千戶以上者即於棚居鄉壯中揀選保甲長承充巡查如棚民內有窩匪姦盜等事地主并保甲長不行首告連坐治罪能首獲者照例優賞又議廣東省山多田少窮民入山搭寮取香木煮粉砍柴燒炭自食其力令各州縣將山內各廠照

保甲之法一例編查每寨給牌一張令通寨之人互相保結再於一寨之內擇老成謹慎有妻室之人點為寨長寨戶悉聽鈐束倘有窩藏奸宄等弊寨長及互結之人報官究治容隱不報發覺連坐寨長照總甲例治罪

六年定州縣額設件作名數并賞給之例件作一役載在經制全書人命重情賴以相驗虛實所關甚重充此役者皆預先學習講究久之始能無誤

直省州縣或有或無雍正三年刑部條奏令各省
督撫飭查額設名數又以作作止有治罪之條並
無獎賞之例無以示鼓勵嗣後有三年無弊者并議
賞給尋據各督撫前後咨覆刑部彙奏大州縣額
設三名中州縣二名小州縣一名仍各再募一二
名令其跟隨學習預備頂補各給洗冤錄一本選
委明白刑書一名為之逐細講解務使曉暢熟習
當場無誤將各州縣皂隸裁去數名以其工食分

別撥給資其養贍三年果無情弊免其本身徭役
若有暗昧難明之案果能檢驗得法洗雪沉寃者
另給賞銀以示鼓勵有弊者照例治罪奉

旨依議件作三年無弊事繁之州縣賞銀十兩稍簡者賞
銀六兩最簡者賞銀四兩永著為例至乾隆五年奉
諭旨州縣設立件作因係命案所關故從前定例甚詳
並曾蒙

世宗憲皇帝諭旨將件作三年無弊者賞給銀兩以示鼓

勵凡以慎重民命至為周悉乃近年以來聞外省並不實力奉行照額募補惟藉隣封調取應用以致命案遲延拖累相驗未能明確此固州縣之怠忽亦該管上司不能留心查察之故著各該督撫嚴飭查明未設之州縣即行勒限募補悉遵定例辦理嗣後若各州縣仍然忽視督撫不行查叅應如何分別定以處分之處交部定議具奏尋議州縣官仍然忽視者降二級調用道府以上官罰俸有差

又禁止擅用驛夫奉

諭旨各省驛站夫役原以備公事之用國家歲費帑金本欲使州縣無賠累之苦民間無差派之擾官民並受其福也但聞各省往來人員有不應用驛夫而擅自動用者該管之人或畏其威勢而不敢不應或迫於情面而不得不應積習相沿驟難禁止地方夫役並受擾累嗣後倘有違例妄索者照例治罪

又禁止四川跳甲揀花之弊戶部等衙門議覆奉

差四川之給事中等條奏事宜內一條言從前川
省差徭繁重保甲人役或按月支應或按里分派
數鄉之人夾雜一處名為跳甲插花其弊無窮今
雜辦差徭悉蒙除免豈可任其仍沿舊習應行禁
止以息擾累從之

七年禁止鄉紳奴僕充當書役侍講學士俞兆晟
奏言鄉紳奴僕不宜令充書役下部議奏言各大
小衙門書役定例俱止許農民承充但積習相沿

多有鄉紳家僕夤緣充當此輩皆粗通書算熟習
規矩又能先意承旨曲意趨逢使本官受其蒙蔽
以致諸事朋比作奸上下扶同種種為害甚為可
惡應如所請令該督撫詳查革除永為定例
八年以各省大員不能約束書吏胥役

特諭訓飭

諭旨朕聞有數省督撫藩臬不能約束書胥者其胥役入
等狐假虎威無惡不作而督撫衙門為尤甚其名有內

外班之分內班總管案件外班傳遞信息朋比作奸種
種嚇詐飽其貪壑則改重為輕拂其所欲則批駁不已
至於承舍旗牌等名皆自號為差官該督撫給票差遣
亦用差官字樣而通省吏民遂莫不以差官目之平日
踞坐班房包攬詞狀每於府州縣官謁見督撫之便私
行囑託濫准枉斷及差往他處則肩輿逾分馬掛胸纓
儼然官長沿途拜會有司需索夫馬餽送此輩狡猾性
成或以小忠小信趨奉本官得其歡心間或諉其訪察

屬員事跡則假公濟私作威作福其害更不可言矣從來胥吏之為患有關吏治在精明廉察之督撫自能覺照而防範之而庸懦之督撫為所欺而不知受其累而不悟者正不少也又如藩司掌通省之錢糧臬司掌通省之刑名不得不仗熟練之書吏為之辦理而其中百弊叢生舞文弄法之處不可悉數朕素知此輩之情狀已經定例嚴申禁約今再行訓飭是在督撫藩臬等約束於平時訪察於臨事不因熟悉條例而輕聽其言不因

善承使令而誤墮其術秉公駕馭用意防閑一有見聞即加懲治不存姑息之見不留回護之心如此則若輩雖欲舞弊而不能雖欲玩法而不敢矣

又加增四川雲貴等地方民夫腳價時以烏蒙用兵役民轉餉給與腳價間有不敷奉

諭旨烏蒙逆蠻不法雲貴四川現在用兵征勦聞川省之永寧建昌地方山路崎嶇所用軍糧皆須民人背負方能運送非若坦途之可以車馬馱載也舊例每糧一石運

送百里給與腳價一錢而民夫一名止能背負米糧三斗百里之程須行二日是百姓一日之所得無幾未足供其日用之資著該撫即行確查凡川省有山路險峻之處運送軍糧須用人力與永寧建昌相類者著將腳價速議加增一面奏聞一面即行給發其他雲貴等省若有似此之處亦著該督撫確查增添仍一面奏聞該地方有司務當實力禁止侵冒等弊使力役之民實沾恩澤

九年令江南蘇州踰坊設立場總甲長南北商販
青藍布疋俱於蘇郡染造踰坊多至四百餘處踰
匠不下萬有餘人時浙江總督李衛節制江南因
陳地方營制事宜言此等踰匠多係單身烏合防
範宜嚴請照保甲之法設立甲長與原設坊總互
相稽查部議從之

又令甘肅回民通編保甲選掌教人以資稽查巡
撫許容奏言甘肅回民居住之處應令地方官編

卷二十三
為保甲除設立牌頭甲長保正外選其中殷實老
成者充為掌教如人戶多者再選一人為副不時
稽查所管回民一年之內並無匪盜等事者酌給
花紅以示鼓勵下部議從之

十二年裁減直省民壯額數先是河東總督田文
鏡奏言州縣額設民壯內撥給司道府廳佐貳衙
門不過隨從並無差使各官公所俱在州縣境內
可資捍禦無俟分派各衙門再各州縣所設民壯

亦不必皆用五十名之多除省城首府所屬大縣
仍給五十名外其別府屬極衝之州縣酌存四十
名次衝三十五名簡僻三十名亦已敷用請將司
道府廳佐雜等衙門民壯盡行裁汰仍歸里甲編
管惟是民壯有修飾器械製辦火藥等費每名給
銀六兩實屬不敷請即以裁汰所餘工食每名增
給二兩以作器具之資專心學習責令營員訓練
拔入營伍俾有進身之階經大學士議覆奉

諭旨大學士等稱直省不可一縣而論所奏亦是若各省
中有可以照河東舉行者著該督撫酌量具奏至是大
學士等再議各按所奏裁其冗設存其應用又以裁
減所餘工食酌養餘丁下部通行為例

皇朝文獻通考卷二十三